

Sarajevo, 19.04.2012. godine
Broj: 254/12

ZAPISNIK I ZAKLJUČCI
SA OSAMNAESTE SJEDNICE PREDSJEDNIŠTVA SKUPŠTINE
SAVEZA OPĆINA I GRADOVA FEDERACIJE BIH

U Općini Stari Grad Sarajevo je dana 17.04.2012. godine održana Osamnaesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Skupštine Saveza prisustvovali su:

1. **g-din Vlado Alilović**, načelnik Općine Vitez, predsjednik
2. **g-din Ermin Hajder**, načelnik Općine Bosanski Petrovac
3. **g-din Salem Dedić**, načelnik Općine Jablanica
4. **g-din Luka Jurić**, načelnik Općine Odžak
5. **g-din Hakija Osmić**, načelnik Općine Zavidovići
6. **g-din Miroslav Živanović**, zamjenik gradonačelnika, Grad Sarajevo
7. **g-din Muhamed Ramović**, načelnik Općine Goražde
8. **g-din Senaid Memić**, načelnik Općine Ilidža
9. **g-din Luka Čelan**, načelnik Općine Livno

Pored gore navedenih, sjednici su prisustvovali i: **g-din Ibrahim Hadžibajrić**, načelnik Općine Stari Grad Sarajevo, **g-din Nisvet Hrnjić**, načelnik Općine Jajce, **g-đa Vesna Travljanin**, direktor Saveza, **g-din Erik Boven**, tim lider projekta „Jačanje kapaciteta saveza općina i gradova u Bosni i Hercegovini“ – CDMA, **g-din Mario Vignjević**, predstavnik Švedske agencije za međunarodnu razvojnu saradnju – Sida, **g-din Šaćir Šošević**, direktor „Geoprojekt“ d.o.o. Sarajevo, **g-din Samir Omerefendić**, rukovodilac projekta „Jačanje lokalne demokracije/demokratije“ – LOD II, UNDP, **g-đa Zlata Turkić**, viši saradnik za rad sa skupštinskim komisijama i institucijama vlasti, **g-đa Elvira Imširović-Bolić**, viši saradnik za pravna pitanja, **g-đa Selma Fišek**, viši saradnik za pravna pitanja i **g-đa Dženita Kovačević**, viši saradnik za finansijska pitanja.

G-din Vlado Alilović pozdravlja prisutne i predlaže da se g-din Ibrahim Hadžibajrić obrati prisutnima u ime domaćina.

G-din Hadžibajrić pozdravlja prisutne i izražava zadovoljstvo činjenicom što je Općina Stari Grad Sarajevo domaćin Osamnaeste sjednice Predsjedništva Saveza i zahvaljuje na velikom odzivu. Ukratko predstavlja Općinu Stari Grad i navodi da je to općina koja ima 56 700 stanovnika, da zauzima površinu od 55 km² i da ima najmanji broj nezaposlenih u Kantonu Sarajevo od 11,6 %.

G-din Vlado Alilović navodi da je Dnevni red za sjednicu dostavljen u materijalima i pita da li ima prijedloga za njegovo proširenje. Zatim, predlaže Dnevni red kako slijedi.

1. Usvajanje Zapisnika i Zaključaka sa Sedamnaeste sjednice Predsjedništva Skupštine Saveza općina i gradova Federacije Bosne i Hercegovine
2. Izvještaj o izvršenju Finansijskog plana Saveza općina i gradova Federacije Bosne i Hercegovine za 2011. godinu sa stavom Nadzornog odbora
Izjavitelj: Vesna Travljanin, direktor Saveza
3. Prijedlog Finansijskog plana Saveza općina i gradova Federacije Bosne i Hercegovine za 2012. godinu
Izjavitelj: Vesna Travljanin, direktor Saveza
4. Rad na zakonodavnim aktivnostima Saveza:
 - 4.1. Zabilješka sa Komisije za ekonomski razvoj općina i gradova i finansije (11. sjednica)
 - 4.1.1. Informacija sa Prve sjednice radne grupe za analizu i pripremu rješenja u oblasti pripadnosti javnih prihoda u FBiH i izradu prijedloga za izradu novog Zakona o pripadnosti javnih prihoda u FBiH
 - 4.1.2. Nacrt zakona o stvarnim pravima
 - 4.1.3. Nacrt zakona o korištenju obnovljivih izvora energije i efikasne kogeneracije
 - 4.1.4. Nacrt zakona o turističkim zajednicama i promicanju turizma u FBiH
 - 4.1.5. Preporuka ombudsmena za ljudska prava BiH u vezi sa promoviranjem međuopćinske saradnje u oblasti inspekcijanskog nadzora
 - 4.2. Zabilješka sa sjednice Komisije za ekonomski razvoj općina i gradova i finansije (12. sjednica)
 - 4.2.1. Prijedlog zakona o koncesijama
 - 4.2.2. Nacrt izmjena Zakona o cestama
 - 4.2.3. Inicijativa općine Bihać za zaštitu lokalne samouprave
 - 4.3. Zabilješka sa sjednice Komisije za ustavna i zakonodavna pitanja
 - 4.3.1. Prijedlog zakona o poljoprivrednim savjetodavnim službama
 - 4.3.2. Nacrt zakona o igrama na sreću
 - 4.3.3. Nacrt zakona o izmjenama i dopunama Zakona o komunalnim djelatnostima Tuzlanskog kantona
 - 4.3.4. Inicijativa za izmjene i dopune Zakona o pravobranilaštvu u Federaciji Bosne i Hercegovine
 - 4.3.5. Inicijativa za pokretanje postupka dodjele koncesija u vezi korištenja vodotoka rijeke Une za potrebe hidroenergetskog objekta „Kostela“
Izjavitelj: Zlata Turkić, viši saradnik za rad sa skupštinskim komisijama i institucijama vlasti
 - 4.4. Izvještaj sa drugog sastanka Radne grupe za analizu i pripremu rješenja u oblasti pripadnosti javnih prihoda u Federaciji BiH i izradu prijedloga novog Zakona o pripadnosti javnih prihoda u Federaciji BiH
Izjavitelj: Hakija Osmić, član Radne grupe
 - 4.5. Izvještaj sa sastanka u organizaciji OSCE-a
Izjavitelj: Vesna Travljanin, direktor Saveza
5. Projekat „Beacon schema“ – Svečana ceremonija dodjele nagrada šestog kruga
Izjavitelj: Vesna Travljanin, direktor Saveza
6. Imenovanje predstavnika Saveza u:

- a) Radnu grupu za izradu Kodeksa o odnosima između nivoa vlasti u Federaciji Bosne i Hercegovine;
 - b) Koordinacijsko tijelo za obuku zaposlenika u jedinicama lokalne samouprave (Odluka o usvajanju Strategije obuke za zaposlenike u jedinicama lokalne samouprave u Federaciji BiH, „Službene novine Federacije BiH“ broj: 19/12)
7. Projekat „Jačanje kapaciteta saveza općina i gradova u Bosni i Hercegovini“ – CDMA
- a) Izvještaj sa sastanka Savjetodavnog odbora održanog 04.04.2012. godine
 - b) Usvajanje Odluke o uspostavljanju Centra za edukaciju i dijalog pri Savezu općina i gradova Federacije Bosne i Hercegovine
 - c) Usvajanje Preporuke u vezi sa uređenjem unutrašnje i međusobne komunikacije između članica Saveza i Saveza
Izvjestilac: Vesna Travljanin, direktor Saveza
8. Prijedlog novog projekta za jačanje jedinica lokalne samouprave kroz neposredno učešće građana finansiranog od strane Sida-e (Švedska međunarodna agencija za razvojnu saradnju)
Izvjestilac: Mario Vignjević, predstavnik Sida-e
9. Izvještaj sa održanih skupova:
- a) Konferencija na temu: „Problemi u vezi sa primjenom Zakona o zaštiti i dobrobiti životinja sa aspekta lokalnih zajednica“ i predstavljanje programa „Evropa za građane“
Izvjestilac: Elvira Imširović-Bolić, viši saradnik za pravna pitanja
 - b) Radionice na temu: „O Evropskoj uniji na lokalnom nivou“
Izvjestilac: Šejla Hasić, viši saradnik za projekte – projekt menadžer
10. Cirkularna obavijest JP Geodetskog zavoda Bosne i Hercegovine - Upozorenje na nezakonite radnje Uprave za geodetske i imovinsko – pravne poslove Vlade Federacije Bosne i Hercegovine
Izvjestilac: Nisvet Hrnjić, načelnik Općine Jajce
11. Informacija o Ugovoru o poslovno-tehničkoj saradnji između Saveza općina i gradova Federacije BiH i „GEOPROJEKT“ d.o.o. Sarajevo
Izvjestilac: Šaćir Šošević, „GEOPROJEKT“ d.o.o. Sarajevo, direktor
12. Prezentacija LOD metodologije za dodjelu sredstava organizacijama civilnog društva
Izvjestilac: Samir Omerefendić, projekt menadžer
13. Tekuća pitanja

Dnevni red je jednoglasno usvojen.

1. Usvajanje Zapisnika i Zaključaka sa Sedamnaeste sjednice Predsjedništva Skupštine Saveza općina i gradova Federacije Bosne i Hercegovine

G-din Vlado Alilović naglašava da je posljednja sjednica Predsjedništva Saveza davno održana i da se zbog vremenskih neprilika sjednica planirana za februar morala odgoditi.

G-din Vlado Alilović otvara raspravu. Nakon konstatacije da nema komentara, stavlja Zapisnik i zaključke na glasanje.

Zapisnik i zaključci sa Sedamnaeste sjednice Predsjedništva Skupštine Saveza općina i gradova Federacije Bosne i Hercegovine su jednoglasno usvojeni.

2. Izvještaj o izvršenju Finansijskog plana Saveza općina i gradova Federacije Bosne i Hercegovine za 2011. godinu sa stavom Nadzornog odbora

G-din Vlado Alilović daje riječ g-đi Vesni Travljanin.

G-đa Vesna Travljanin ističe da je ukupan finansijski rezultat Saveza u prošloj godini pozitivan. Navodi da su materijali dostavljeni članovima Predsjedništva, te naglašava da su razvijene komparativne analize uplate članarina od strane članica Saveza. Naglašava da Savez redovno izvještava članice o stanju naplate članarina. Izvještava da su u sklopu CDMA projekta - „Jačanje kapaciteta saveza općina i gradova u Bosni i Hercegovini“, obavljene dvije revizije. Naglašava da nismo zadovoljni naplatom članarina, da je procenat naplate sa 31.12.2011. godine bio 81% i da su povećane aktivnosti Saveza kroz različite projekte. Ističe da je Nadzorni odbor razmotrio Izvještaj o izvršenju finansijskog plana i preporučio Predsjedništvu Saveza da ga usvoji.

G-din Vlado Alilović postavlja pitanje kolika je razlika neuplaćenih članarina u apsolutnom iznosu.

G-đa Vesna Travljanin navodi da je to iznos od oko 60 000 – 70 000 hiljada KM i konstatuje da to nije malo.

G-din Vlado Alilović otvara raspravu.

G-din Nisvet Hrnjić smatra da nije odraz finansijske krize to što neke općine ne uplaćuju članarinu, jer to nije veliki iznos. Naglašava da je potrebno apelirati na općine koje godinama ne izmiruju članarinu da ozbiljno shvate svoju obavezu.

G-din Vlado Alilović navodi da je u jutarnjim satima održan sastanak sa predstavnicima Vlade Federacije Bosne i Hercegovine na čelu sa Premijerom Nerminom Nikšićem na kojem je, između ostalog, razgovarano o izradi Kodeksa o odnosima između nivoa vlasti u Federaciji Bosne i Hercegovine. Naglašava da nije zadovoljan neusvajanjem bitnih zakona za jedinice lokalne samouprave, te da se očekuje pomak nakon razgovora u Vladi i ističe da će Savez imati predstavnika u radnoj grupi za izradu Kodeksa. Apelira na načelnike da urgiraju u svojim općinama kako bi one općine koje duguju puno po osnovu uplate članarina, izmirile svoje obaveze.

Izvještaj o izvršenju Finansijskog plana Saveza općina i gradova Federacije Bosne i Hercegovine za 2011. godinu sa stavom Nadzornog odbora je jednoglasno usvojen.

3. Prijedlog Finansijskog plana Saveza općina i gradova Federacije Bosne i Hercegovine za 2012. godinu

G-đa Vesna Travljanin naglašava da se i načelnici trebaju uključiti u lobiranje za usvajanje zakona, prvenstveno preko svojih predstavnika u Parlamentu Federacije Bosne i Hercegovine, te da je Vlada Federacije Bosne i Hercegovine na sastanku pokazala razumijevanje za daljnje aktivnosti sa Savezom.

Kada je u pitanju Prijedlog Finansijskog plana Saveza općina i gradova Federacije Bosne i Hercegovine, navodi da je on u najvećem dijelu baziran na Finansijskom planu iz 2011. godine, s tim što ističe da su vrlo izvjesni novi projekti u čijoj će implementaciji učestvovati Savez, kao što su novi projekat koji će finansirati Sida, te projekat sa SDC-om. Navodi i projekte IPA prekogranične saradnje na koje je Savez aplicirao, zatim projekat „Beacon schema“ i naglašava da su prihodi Saveza uvećani zbog projektnih sredstava.

G-din Vlado Alilović otvara diskusiju. Nakon konstatacije da nema prijavljenih za diskusiju, stavlja na glasanje Prijedlog Finansijskog plana Saveza općina i gradova Federacije Bosne i Hercegovine za 2012. godinu.

Prijedlog Finansijskog plana Saveza općina i gradova Federacije Bosne i Hercegovine za 2012. godinu je jednoglasno usvojen.

4. Rad na zakonodavnim aktivnostima Saveza:

4.1. Zabilješka sa sjednice Komisije za ekonomski razvoj općina i gradova i finansije (11.sjednica)

4.1.1. Informacija sa Prve sjednice radne grupe za analizu i pripremu rješenja u oblasti pripadnosti javnih prihoda u FBiH i izradu prijedloga za izradu novog Zakona o pripadnosti javnih prihoda u FBiH

4.1.2 Nacrt zakona o stvarnim pravima

4.1.3.Nacrt zakona o korištenju obnovljivih izvora energije i efikasne kogeneracije

4.1.4.Nacrt zakona o turističkim zajednicama i promicanju turizma u FBiH

4.1.5.Preporuka ombdusmena za ljudska prava BiH u vezi sa promoviranjem međuopćinske saradnje u oblasti inspekcijskog nadzora

G-din Vlado Alilović ističe da su poslani obimni materijale za ovu tačku.

G-đa Zlata Turkić napominje da je na sjednici podijeljena Zabilješka sa Dvanaeste sjednice Komisije za ekonomski razvoj općina i gradova i finansije. Naglašava da je zaključak Komisije bio da Predsjedništvo ozbiljnije razmotri nacrt Zakon o stvarnim pravima koji će se uskoro u formi prijedloga naći na Predstavničkom domu Parlamenta Federacije BiH. Naglašava da se u materijalima nalaze zaključci komisije po tačkama.

G-din Vlado Alilović predlaže da se ide redom po tačkama.

G-đa Zlata Turkić navodi zaključke komisije po tačkama kako slijedi:

- Predlaže se Predsjedništvu Skupštine Saveza općina i gradova FBiH da definiše sljedeće zaključke koje će proslijediti Federalnom ministarstvu finansija:
 - jasno definirati i obuhvatiti sve javne prihode svih nivoa vlasti u FBiH i adekvatno ih kategorizirati;
 - općinama povećati postotak udjela od prihoda sa Jedinstvenog računa sa 8,42 na 10%;
 - iznaći modus otplate vanjskog duga tako da svi nivoi vlasti otplaćuju svoj dug;
 - riješiti pitanje finansiranja općina Kantona Sarajevo tako da direktno dobiju prihode sa Jedinstvenog računa, a ne preko Kantona;
 - riješiti pitanje finansiranja Grada Sarajeva po ponuđenom modelu;
 - općinama Kantona Sarajevo dodijeliti isti postotak od poreza na dohodak kao i ostalim jedinicama lokalne samouprave;
 - jedinicama lokalne samouprave dodijeliti veći postotak od poreza na dohodak i poreza na dobit;
 - izvršiti reformu poreza na imovinu;
- predlaže se Predsjedništvu Skupštine Saveza općina i gradova FBiH da prihvati Nacrt zakona o korištenju obnovljivih izvora energije i efikasne kogeneracije kao dobru osnovu za izradu Prijedloga zakona uz, što je moguće više, usvajanje primjedbi na Nacrt zakona koje su poslale jedinice lokalne zajednice (Grad Sarajevo, Velika Kladaša, Ključ, Živinice, Maglaj i Tomislavgrad) i koje su prosljeđene nadležnom ministarstvu kao predlagaču i Privrednoj komori Federacije BiH.
- predlaže se Predsjedništvu Skupštine Saveza općina i gradova FBiH da prihvati Nacrt zakona o turističkim zajednicama i promicanju turizma u FBiH kao dobru osnovu za izradu Prijedloga

zakona koji bi, zbog izrazitih potreba jedinica lokalne samouprave, što prije trebao biti u parlamentarnoj proceduri.

- predlaže se Predsjedništvu Skupštine Saveza općina i gradova Federacije BiH da usvoji Preporuku Institucije ombudsmena za ljudska prava BiH u vezi sa promoviranjem međuopćinske saradnje u oblasti inspekcijuskog nadzora i uputi je svim jedinicama lokalne samouprave.

Zaključci komisije su jednoglasno usvojeni.

4.2. Zabilješka sa sjednice Komisije za ekonomski razvoj općina i gradova i finansije (12.sjednica)

4.2.1.Prijedlog zakona o koncesijama

4.2.2.Nacrt izmjena Zakona o cestama

4.2.3.Inicijativa općine Bihać za zaštitu lokalne samouprave

G-đa Zlata Turkić ističe da je Komisija puno radila na Zakonu o koncesijama, da je pripremljen i prijedlog izmjena ovog zakona koji će u formi amandmana biti upućen Vladi Federacije BiH, a koji se odnosi na preciziranje i razgraničavanje nadležnosti Federacije BiH, kantona i općina za dodjelu koncesija za pojedine oblasti.

G-đa Vesna Travljanin naglašava da je na sastanku u Vladi Federacije BiH bio prisutan i federalni ministar prostornog uređenja Desnica Radivojević koji je napomenuo da će se 25. i 26. aprila održati sjednica Predstavničkog doma Parlamenta Federacije BiH kada će se razmatrati prijedlog Zakona o koncesijama.

G-din Miroslav Živanović ističe da je u amandmanima pored riječi općina, potrebno dodati i riječ grad.

G-din Ermin Hajder naglašava da je Ministarstvo poljoprivrede Unsko-sanskog kantona donijelo Uredbu o šumama, odnosno samo prepisalo federalnu uredbu i ističe da tu postoji veliki problem.

Gdin Vlado Alilović konstatuje da je situacija vrlo ozbiljna.

- **Predsjedništvo je primilo k znanju ovu informaciju;**
- **usvojen je zaključak da se uputi dopis zakonodavcu, nadležnom ministarstvu i kantonalnim skupštinama u kojem će se navesti da se ne koristi pravni vakum, te da je potrebno hitno rješavanje problema sa Zakonom o šumama jer je u toj oblasti stanje alarmantno.**

G-đa Zlata Turkić je navela slijedeće zaljučke komisije:

- Komisija predlaže Predsjedništvu Saveza da podrži Nacrt izmjena i dopuna Zakona o cestama u Federaciji BiH;
- Inicijativu Općine Konjic proslijediti Federalnom ministarstvu prometa i komunikacija kao inicijativu Saveza sa zahtjevom da se razmotri i ugradi u tekst Prijedloga Zakona o cestama u Federaciji BiH.
- podržava se Inicijativa Općine Bihać za zaštitu prava na lokalnu samoupravu.

Zaključci komisije su jednoglasno usvojeni.

4.3. Zabilješka sa sjednice Komisije za ustavna i zakonodavna pitanja

4.3.1.Prijedlog zakona o poljoprivrednim savjetodavnim službama

4.3.2. Nacrt zakona o igrama na sreću

4.3.3. Nacrt zakona o izmjenama i dopunama Zakona o komunalnim djelatnostima Tuzlanskog kantona

4.3.4. Inicijativa za izmjene i dopune Zakona o pravobranilaštvu u Federaciji Bosne i Hercegovine

4.3.5. Inicijativa za pokretanje postupka dodjele koncesija u vezi korištenja vodotoka rijeke Une za potrebe hidroenergetskog objekta „Kostela“

G-đa Zlata Turkić navodi zaključke koje je Komisija usvojila:

- Da se novi prijedlog Zakona o poljoprivrednim savjetodavnim službama dostavi Savezu općina i gradova FBiH kako bi se članice Saveza mogle očitovati;
- Komisija u principu podržava donošenje Zakona i o njemu će se izjasniti kad dobije novi Prijedlog;
- Prijedlog zakona o poljoprivrednim savjetodavnim službama obavezno uskladiti sa Zakonom o principima lokalne samouprave u FBiH;
- Prihvataju se primjedbe dostavljene iz jedinica lokalne samouprave na nacrt Zakona o igrama na sreću;
- Tražiti od Federalnog ministarstva finansija/financija da zakonom predvide uključivanje jedinica lokalne samouprave u proceduru za izdavanje dozvola za prostor namijenjen za igre na sreću, kao i dobijanje dijela sredstava od istih;
- Daje se pozitivno mišljenje na nacrt Zakona o izmjenama i dopunama Zakona o komunalnim djelatnostima Tuzlanskog kantona s preporukom da se, pri izradi Prijedloga zakona što je više moguće uključe prijedlozi jedinica lokalne samouprave s područja Tuzlanskog kantona;
- Predlaže se da predsjednik Komisije, Predrag Šupljeglav, u ime Saveza, napiše inicijativu prema drugim kantonima/županijama u Federaciji BiH u kojoj će se inicirati izmjene i dopune Zakona o komunalnim djelatnostima u pogledu uvođenja komunalnih redara;
- Komisija predlaže Predsjedništvu da podrži Inicijativu za pokretanje postupka dodjele koncesija u vezi korištenja vodotoka rijeke Une za potrebe hidroenergetskog objekta „Kostela“, koju je Općina Bihać uputila prema Vladi Federacije BiH;
- Predsjednik Komisije, Predrag Šupljeglav, predložio je da članovi Komisije u svojim kantonima/županijama pokrenu inicijativu za izmjene propisa koji bi povećali prihode jedinica lokalne samouprave.

Zaključci komisije su jednoglasno usvojeni.

4.4 Izvještaj sa drugog sastanka Radne grupe za analizu i pripremu rješenja u oblasti pripadnosti javnih prihoda u Federaciji BiH i izradu prijedloga novog Zakona o pripadnosti javnih prihoda u Federaciji BiH

G-din Hakija Osmić ističe da su iz kantona pristigli prijedlozi za izmjene Zakona o pripadnosti javnih prihoda u Federaciji BiH koji su se većinom odnosili na izmjene kriterija raspodjele između kantona, a kojima se povećaju prihodi kantona uglavnom na uštrb Kantona Sarajevo. Navodi primjer sa Općinom Kakanj. Smatra da je možda najrelnija varijanta linearno povećanje, ali se tome protive kantoni. Ističe da je skeptičan po pitanju donošenja izmjena Zakona o pripadnosti javnih prihoda u Federaciji BiH iz razloga što je teško usaglasiti stavove svih strana.

G-đa Dženita Kovačević naglašava da je Komisija za ekonomski razvoj općina i gradova i finansije zajedno sa pomoćnicima načelnika za finansije održala tematsku sjednicu na ovu temu i da nije postignut konsenzus oko horizontalne raspodjele prihoda i navodi da je dogovoreno da se ide sa

prijedlogom da se raspodjela vrši prije otplate vanjskog duga. Navodi općine koje su poslale svoje primjedbe i prezentira prijedloge Općine Tešanj i Općine Kakanj. Ističe da su efekti pristiglih prijedloga općina prikazani na tematskoj sjednici, te da su nakon toga materijali oko kojih je postignut konsenzus poslani Federalnom ministarstvu finansija koje je tražilo prijedloge za horizontalnu raspodjelu prihoda između jedinica lokalne samouprave, ali da oko toga nije postignut konsenzus.

G-din Hakija Osmić navodi da se raspodjela prihoda mora vršiti prije otplate vanjskog duga.

G-din Luka Jurić ističe da nije slučajno da su iz njegovog kantona stigla tri prijedloga, jer smatra da je kanton u tako teškoj situaciji da će bankrotirati i naglašava da je Općina Odžak ranije nešto dobivala od kantona, a da sada ne dobija ništa.

G-đa Dženita Kovačević naglašava da će se 2013., 2014. godine početi otplaćivati glavnica vanjskog duga prema Međunarodnom monetarnom fondu i da će jedinice lokalne samouprave to osjetiti, te ističe da će se npr. Općini Tuzla umanjiti prihodi sa jedinstvenog računa za oko milion KM u 2014. godini. Navodi prijedlog finansiranja za Grad Sarajevo i općine Kantona Sarajevo.

G-din Hakija Osmić smatra da Predsjedništvo treba ići sa dva prijedloga prema Radnoj grupi, a to su: da se ne pravi horizontalni model raspodjele prihoda među jedinicama lokalne samouprave i da se traži veći procenat za jedinice lokalne samouprave od indirektnih poreza.

G-din Miroslav Živanović smatra da će kantoni otići do vraga jer je ovo stanje neodrživo. Ističe da općine dobijaju nadležnosti od strane kantona, ali ne i sredstva za njihovo izvršavanje. Naglašava da su jedinice lokalne samouprave direktno na udaru građana. Smatra da se raspodjela treba vršiti prije otplate vanjskog duga.

G-din Vlado Alilović ističe da su zaključci formirani na tematskoj sjednici Komisije.

Predsjedništvo je zauzelo stav da se neće ulaziti u horizontalnu raspodjelu prihoda između jedinica lokalne samouprave i usvojilo zaključak kojim se traži povećanje procenta od prihoda sa Jedinstvenog računa sa 8,42% na 10% jedinicama lokalne samouprave, te da će se u slučaju povećanja procenta vršiti linearna raspodjela dodatnih prihoda između jedinica lokalne samouprave.

4.5. Izvještaj sa sastanka u organizaciji OSCE-a

G-đa Vesna Travljanin ističe da je Savez od federalnog ministra pravde dobio uvjerenja da on nema ništa protiv da nacrt Zakona o zaposlenicima u organima jedinica lokalne samouprave ide u parlamentarnu proceduru. Navodi da je OSCE 27. marta 2012. godine u Sarajevu organizovao sastanak sa predstavnicima federalnih organa vlasti, Saveza općina i gradova Federacije BiH i Evropske delegacije u BiH na kojem su razmatrana pitanja vezana za usvajanje Zakona o državnim službenicima i namještenicima u organima državne službe Federacije Bosne i Hercegovine i Zakona o zaposlenicima u organima jedinica lokalne samouprave u Federaciji Bosne i Hercegovine.

5. Projekat „Beacon schema“ – Svečana ceremonija dodjele nagrada šestog kruga

G-đa Vesna Travljanin naglašava da je svima poznat ovaj projekat, te da se nekad zbog rada na zakonodavnim aktivnostima zanemare aktivnosti na projektima. Ističe da su Grad Mostar, Općina Livno i Općina Novo Sarajevo dobitnici priznanja „Beacon status“ u šestom krugu, te poziva prisutne na ceremoniju dodjele priznanja koja će biti održana u Brčkom u drugoj polovini mjeseca aprila.

Informacija je primljena k znanju.

6. Imenovanje predstavnika Saveza u:

a) Radnu grupu za izradu Kodeksa o odnosima između nivoa vlasti u Federaciji Bosne i Hercegovine;

G-đa Vesna Travljanin ističe da je Kodeks vrlo bitan i da su prijedlozi Saveza za članove Radne grupe za izradu Kodeksa g-din Miroslav Živanović i g-din Nedžad Koldžo.

G-din Vlado Alilović smatra da bi bilo dobro da jedan član Radne grupe bude neko izvan Sarajeva.

G-đa Vesna Travljanin predlaže g-dina Predraga Šupljeglava i g-dina Miroslava Živanovića.

Predsjedništvo je usvojilo Zaključak da su članovi Radne grupe za izradu Kodeksa o odnosima između nivoa vlasti u Federaciji Bosne i Hercegovine g-din Predrag Šupljeglav i g-din Miroslav Živanović.

b) Koordinacijsko tijelo za obuku zaposlenika u jedinicama lokalne samouprave (Odluka o usvajanju Strategije obuke za zaposlenike u jedinicama lokalne samouprave u Federaciji BiH, „Službene novine Federacije BiH“ broj: 19/12)

G-đa Vesna Travljanin navodi da je Stručna služba Saveza kontaktirala načelnike općina Domaljevac-Šamac i Doboj-Jug i da su isti pristali da ispred Saveza budu članovi Koordinacijskog tijela za obuku.

Predsjedništvo je usvojilo Zaključak da su članovi Koordinacijskog tijela za obuku zaposlenika u jedinicama lokalne samouprave u Federaciji BiH g-din Željko Josić g-din Džavid Aličić.

7. Projekat „Jačanje kapaciteta saveza općina i gradova u Bosni i Hercegovini“ – CDMA

- a) Izvještaj sa sastanka Savjetodavnog odbora održanog 04.04.2012. godine**
- b) Usvajanje Odluke o uspostavljanju Centra za edukaciju i dijalog pri Savezu općina i gradova Federacije Bosne i Hercegovine**
- c) Usvajanje Preporuke u vezi sa uređenjem unutrašnje i međusobne komunikacije između članica Saveza i Saveza**

G-đa Vesna Travljanin naglašava da su dostavljeni materijali za ovu tačku i da je sastanak Savjetodavnog odbora projekta „Jačanje kapaciteta saveza općina i gradova u Bosni i Hercegovini“ – CDMA održan 04.04.2012. godine.

G-đa Selma Fišek navodi da je projektom „Jačanje kapaciteta saveza općina i gradova u Bosni i Hercegovini“ predviđeno uvođenje plaćenih servisa Saveza, a da je Statutom Saveza propisano da se djelatnost Saveza, između ostalog, sastoji i u obavljanju edukacionih aktivnosti, te ističe da se u skladu s tim pri Savezu uspostavlja Centar za edukaciju i dijalog. Naglašava da se Centar za edukaciju i dijalog uspostavlja unutar Stručne službe Saveza i da to ne podrazumijeva registrovanje novog pravnog subjekta. Također, navodi da je u sklopu pomenutog projekta izrađena Preporuka koja se odnosi na uređenje unutrašnje i međusobne komunikacije između članica Saveza i Saveza i koja bi se trebala uputiti članicama Saveza na postupanje.

Predsjedništvo je usvojilo Odluku o uspostavljanju Centra za edukaciju i dijalog kao i Preporuku u vezi sa unutrašnjom i međusobnom komunikacijom između članica Saveza i Saveza, te zaključilo da se ista uputi članicama Saveza na postupanje.

8. Prijedlog novog projekta za jačanje jedinica lokalne samouprave kroz neposredno učešće građana finansiranog od strane Sida-e (Švedska međunarodna agencija za razvojnu saradnju)

G-din Mario Vignjević zahvaljuje na ukazanoj prilici i ukratko informiše o novom projektu naglašavajući da će se on odnositi na potporu i jačanje mjesnih zajednica kroz neposredno učešće građana. Ističe da je projekat još u radnoj verziji o kojoj pregovaraju oba Saveza općina i gradova (FBiH i RS) i naglašava da će Sida pružiti određenu novčanu podršku za rješavanje pitanja kupovine poslovnih prostorija za Savez, kao što je urađeno u Republici Srpskoj kroz CDMA projekat. Naglasio je da će doći do upošljavanja novih ljudi kroz ovaj projekat. Ukazao je da je potrebno da Predsjedništvo Saveza da zeleno svjetlo za daljnje aktivnosti.

Predsjedništvo je dalo saglasnost za daljnje aktivnosti u vezi sa ovim projektom.

9. Izvještaj sa održanih skupova:

- a) Konferencija na temu: „Problemi u vezi sa primjenom Zakona o zaštiti i dobrobiti životinja sa aspekta lokalnih zajednica“ i predstavljanje programa „Evropa za građane“**

G-đa Elvira Imširović-Bolić napominje da je Savez dobio Preporuku od strane Institucije ombudsmena za ljudska prava Bosne i Hercegovine u smislu da je potrebno kroz redovne aktivnosti Saveza organizirati skupove vezane za problem primjene Zakona o zaštiti i dobrobiti životinja, te navodi da je Savez u vezi s tim u Sarajevu 14.03.2012. godine organizirao konferenciju na kojoj su obrađene teme: „Problemi u vezi sa primjenom Zakona o zaštiti i dobrobiti životinja sa aspekta lokalnih zajednica“ i Predstavljanje programa „Evropa za građane“. Navodi da su na konferenciji usvojeni zaključci vezani za izmjene Zakona o zaštiti i dobrobiti životinja koje bi Predsjedništvo Saveza trebalo razmotriti kako bi smo ih nakon eventualnog usvajanja uputili prema svim relevantnim institucijama. Također navodi da su općine Bihać i Kakanj dostavile konkretne prijedloge za izmjene Zakona o zaštiti i dobrobiti životinja.

G-din Vlado Alilović ističe da je konferencija bila dobra, ali da ne zna da li će proizvesti neke rezultate, te navodi da je Zakon o zaštiti i dobrobiti životinja donešen na prečac.

Predsjedništvo je usvojilo Zapisnik i zaključke sa Konferencije na temu: „Problemi u vezi sa primjenom Zakona o zaštiti i dobrobiti životinja sa aspekta lokalnih zajednica“ i predstavljanje programa „Evropa za građane“ i inicijative općina Bihać i Kakanj koje se odnose na izmjene Zakona o zaštiti i dobrobiti životinja, te naložilo Stručnoj službi Saveza da ih uputi prema svim relevantnim institucijama.

- b) Radionice na temu: „O Evropskoj uniji na lokalnom nivou“**

G-đa Vesna Travljanin naglašava da su poslani pisani materijal za ovu tačku i da su radionice bile korisne.

Informacija je primljena k znanju.

10. Cirkularna obavijest JP Geodetskog zavoda Bosne i Hercegovine - Upozorenje na nezakonite radnje Uprave za geodetske i imovinsko – pravne poslove Vlade Federacije Bosne i Hercegovine

G-din Nisvet Hrnjić zahvaljuje što mu je pružena prilika da se obrati prisutnima. Ističe da je ova tema jako bitna jer katastar nije sređen, naglašava da u Općini Jajce postoji popisni katastar iz 1954., te navodi da smatra da ni u drugim općinama nije bolja situacija. Iznosi mišljenje da bi Predsjedništvo Saveza trebalo uputiti apel prema Vladi Federacije BiH da se ova aktivnost ubrza i da se ove stvari

odvijaju brže i efikasnije. Navodi problem sa neusvajanjem Zakona o premjeru i katastru nekretnina. Smatra da se mora ultimativno tražiti od Vlade Federacije BiH da se zakonski riješi ova oblast, jer su općine najmanje krive a najviše ispaštaju.

G-din Luka Jurić naglašava da je po ovom pitanju različita situacija u Federaciji BiH jer je Općini Orašje Federalna uprava za geodetske i imovinsko-pravne poslove dala punu podršku kod uvođenja procesa digitalizacije.

G-din Ermin Hajder ističe da je u Općini Bosanski Petrovac situacija ista kao u Općini Jajce.

Predsjedništvo je usvojilo Zaključak da se insistira na donošenju Zakona o premjeru i katastru nekretnina.

11. Informacija o Ugovoru o poslovno-tehničkoj saradnji između Saveza općina i gradova Federacije BiH i „GEOPROJEKT“ d.o.o. Sarajevo

G-din Šaćir Šošević zahvaljuje na pozivu i navodi da su obavljani pregovori kako sa Savezom tako i sa Privrednom komorom Federacije BiH, te da je kroz ovaj potpisani ugovor napravljen prvi korak zajedničke saradnje. Naglašava da njegova firma ima bogato iskustvo u saradnji sa Svjetskom bankom i Evropskom bankom za obnovu i razvoj, te je ponudio konsultantske usluge. Naglašava veliki značaj razvoja privredne i komunalne infrastrukture i ističe da je namjera da se doprinese njenom boljem razvoju. Napomenuo je da se očekuju razgovori sa pomenutim bankama.

G-din Ermin Hajder traži pojašnjenje za procenat od 2% iz ponuđenog prijedloga projekta.

G-din Šaćir Šošević naglašava da je to navedeni procenat za ukupne aktivnosti.

G-đa Vesna Travljanin navodi da pored ovog načina, općine mogu i same aplicirati na projekte.

Informacija je primljena k znanju.

12. Prezentacija LOD metodologije za dodjelu sredstava organizacijama civilnog društva

G-din Samir Omerefendić pozdravlja prisutne i naglašava da se trenutno završava druga faza LOD projekta i da će treća faza početi početkom juna ove godine. Predstavlja Metodologiju za raspodjelu općinskih sredstava organizacijama civilnog društva. Prezentacija metodologije se nalazi u prilogu Zapisnika.

Usvojen je Zaključak da se Metodologija za raspodjelu općinskih sredstava organizacijama civilnog društva podrži i uputi svim članicama Saveza.

13. Tekuća pitanja

Nakon što je konstatovano da su sve tačke Dnevnog reda iscrpljene, g-din Vlado Alilović zatvara Osamnaestu sjednicu Predsjedništva Saveza u 13:57 sati.

Predsjednik Predsjedništva Skupštine
Vlado Alilović, s.r.